

CUSSEGL GROND

Sessiun d'october 2023

Dumonda Maissen concernent il rinforzament e l'optimaziun da la collavuraziun da las autoritads da persecuziun penala

Da la resposta da la Regenza a l'incumbensa Adank concernent meds legals efficacis cunter la criminalitad liada a l'acquisiziun da drogas resorta, ch'i dat in potenzial considerabel d'optimar la collavuraziun da las autoritads da persecuziun penala en spezial en «proceduras directas». Quai sveglia l'impressiun, che uschenumnads «fatgs simpels» ed il scleriment tras la dretgira cumpetenta chaschunian proceduras memia lungas u che la cumpetenzza vegnia localisada sche pussaivel en in auter lieu. Quai na dovra betg mo bler temp e bleras resursas tar la Procura publica, mabain procura er ch'ils cas vegnan elavurads pli plaun. Entant sa senta la populaziun malsegira e na po betg chapir, ch'i dovra dunsainas da cas, per ch'i capita insatge.

Sa basond sin il chantun Turtig, che definescha per mintga legislatura accents en la persecuziun penala, pari dad esser inditgà, che la collavuraziun tranter la Procura publica e la Polizia chantunala vegn optimada. Quai pertutga cunzunt ils process da lavur generals ed il diever dals meds finanzials tenor finamiras, la planisaziun coordinada e l'explotaziun cumplaina da las libertads d'agir giuridicas ed effectivas per elavurar cas penals, en spezial tras la Procura publica. En las mesiras d'optimaziun da l'Examinaziun da las incumbensas e da las prestaziuns 2022 (EIP) da la Regenza grischuna tracta il chantun bain quests accents tar la Polizia chantunala, percenter manca tutta infurmaziun en chausa tar la Procura publica. E quai malgrà che la Regenza ed en spezial il departament cumpetent per la giustia po dar a la Procura publica directivas liantas davart l'adempliment administrativ da sias incumbensas (art. 6 al. 3 LItCPP; DG 350.100). Latiers tutga per exempel l'introducziun da proceduras directas u la realisaziun da mesiras d'opportunitad. - La collavuraziun tranter la Polizia chantunala e la Polizia da la citad da Cuira en connex cun la preschientscha e cun l'activitad da controlla en il rom da la criminalitad liada a l'acquisiziun da drogas è vegnida intensivada ils ultims mais. In potenzial d'optimaziun datti dentant er en la collavuraziun cun las polizias communalas.

Sut quest aspect sa drizzan las sutsegnadras ed ils sutsegnaders a la Regenza cun las suandantas dumondas:

1. È la Regenza er da l'opiniun da las sutsegnadras e dals sutsegnaders, ch'igl è indispensabel che la Procura publica dovra tut sias libertads d'agir giuridicas ed effectivas per elavurar ils cas penals en moda effizienta?
2. Co fa la Regenza diever da sia cumpetenzza da dar directivas liantas a la Procura publica tenor l'art. 6 al. 3 LItCPP?
3. Tge mesiras èn ord vista da la Regenza necessarias per rinforzar e per optimar la collavuraziun da las autoritads da persecuziun penala, en spezial da la Procura publica e da la Polizia chantunala, ma er da la Polizia chantunala e da las polizias communalas?
4. Tge mesiras d'optimaziun planisescha la Regenza per survegnir sut controlla per exempel la criminalitad liada a l'acquisiziun da drogas e la criminalitad pitschna, per exempel en fatgs da facultad u en cas dal privel da recidiva? Co è l'urari per realisar questas mesiras?

Cuira, ils 18 d'october 2023

Maissen, Pfäffli, Crameri, Adank, Bergamin, Berther, Berweger, Bettinaglio, Binkert, Collenberg, Cortesi, Danuser (Czas), Degiacomi, Derungs, Epp, Föhn, Furger, Gansner, Geisseler, Jochum, Koch, Kohler, Krättli, Lamprecht, Loepfe, Mani, Michael (Donat), Oesch, Righetti, Schneider, Spagnolatti, Ulber, Walser, Zanetti (Sent)